

**НАЙРСАГ ХАРИЛЦАА,  
ХАМТЫН АЖИЛЛАГААНЫ ТУХАЙ  
МОНГОЛ УЛС, БҮГД НАЙРАМДАХ БЕЛАРУСЬ УЛС  
ХООРОНДЫН ГЭРЭЭ**

Монгол Улс болон Бүгд Найрамдах Беларусь Улс, цаашид Хэлэлцэн тохиролцогч Талууд гэх,

хоёр орны ард түмний найрсаг харилцааны уламжлалыг үндэслэж,

Монгол Улс болон Бүгд Найрамдах Беларусь Улс хоорондын эрх тэгш, харилцан ашигтай хамтын ажиллагааг хөгжүүлэх нь ард түмний ашиг сонирхолд нийцэж байгаад итгэж,

Нэгдсэн Үндэстний Байгууллагын Дүрмийн зорилго, зарчмыг хэрэгжүүлэх үүрэг, амлалтаа нотолж,

Хоёр талт харилцааг чанартай шинэ түвшинд гаргах, түүний эрх зүйн үндсийг бэхжүүлэхийг хүсэж,

Дараахь зүйлийг хэлэлцэн тохиролцов:

**1 дүгээр зүйл**

Хэлэлцэн тохиролцогч Талууд өөр хоорондын харилцааг найрсаг харилцааны түвшинд хөгжүүлэх бөгөөд улсын тусгаар тогтнол, бүрэн эрхт байдал, хилийн халдашгүй дархан байдал, нутаг дэвсгэрийн бүрэн бүтэн байдлыг харилцан хүндэтгэж, дотоод хэрэгт үл оролцох болон эрх тэгш байх, хүч үл хэрэглэх буюу хүчээр сүрдүүлэхгүй байх, маргааныг энхийн замаар шийдвэрлэх, хүний эрх, эрх чөлөөг хангах болон олон улсын үүргээ ёсчлон биелүүлэх зарчмыг удирдлага болгоно.

**2 дугаар зүйл**

Хэлэлцэн тохиролцогч Талууд улс төр, эдийн засаг, боловсрол, шинжлэх ухаан, техник, нийгэм, соёл, хүмүүнлэг, хөдөө аж ахуйн болон харилцан сонирхсон бусад салбарт харилцан ашигтай хамтын ажиллагааг хөгжүүлнэ.

### **3 дугаар зүйл**

Хэлэлцэн тохиролцогч Талууд хоёр талт харилцаа, хамтын ажиллагааг гүнзгийрүүлэн хөгжүүлэх, түүнчлэн харилцан сонирхсон олон улсын харилцааны асуудлаар төрөл бүрийн түвшинд тогтмол санал солилцоно.

### **4 дүгээр зүйл**

Хэлэлцэн тохиролцогч Талууд хоёр орны төрийн байгууллага хоорондын харилцаа, холбоог хөгжүүлэхэд тус дөхөм үзүүлнэ.

### **5 дугаар зүйл**

Хэлэлцэн тохиролцогч Талууд засаг захиргааны нэгжийн түвшинд шууд харилцаа, хамтын ажиллагааг өргөжүүлэхэд дэмжлэг үзүүлнэ.

Хэлэлцэн тохиролцогч Талууд өөрийн иргэд болон төрийн бус байгууллага хоорондын холбоог хөгжүүлэхэд тус дөхөм үзүүлнэ.

### **6 дугаар зүйл**

Хэлэлцэн тохиролцогч Талууд энх тайван, аюулгүй байдлыг бэхжүүлэх, эдийн засаг, хүрээлэн буй орчныг хамгаалах зэрэг олон улсын тулгамдсан асуудлыг шийдвэрлэх үүднээс Нэгдсэн Үндэстний Байгууллага болон олон улсын бусад байгууллагын хүрээнд хамтын ажиллагааг хөгжүүлнэ.

### **7 дугаар зүйл**

Хэлэлцэн тохиролцогч Талууд харилцан хөрөнгө оруулалтыг хөхиүлэн дэмжиж, хамгаалах бөгөөд худалдааг, түүний дотор гуравдагч орны түншийн оролцоотойгоор, хөгжүүлнэ.

### **8 дугаар зүйл**

Хэлэлцэн тохиролцогч Тал тус бүр өөрийн нутаг дэвсгэрт Хэлэлцэн тохиролцогч нөгөө Талын аж ахуйн нэгжийн төлөөлөгчийн газрыг нээж, үйл ажиллагаа эрхлэхэд нь тус дөхөм үзүүлнэ.

### **9 дүгээр зүйл**

Хэлэлцэн тохиролцогч Тал тус бүр Хэлэлцэн тохиролцогч нөгөө Талын тээврийн хэрэгсэл, зорчигч болон ачааг өөрийн нутаг дэвсгэрээр дамжин өнгөрөхөд дэмжлэг үзүүлнэ.

Хэлэлцэн тохиролцогч Талууд далайд гарцгүй улсын хувьд олон улсын эрх зүйн зарчим, хэм хэмжээнд нийцүүлэн далайд гарах эрхээ эдлэхэд хамтран ажиллана.

#### **10 дугаар зүйл**

Хэлэлцэн тохиролцогч Талууд онцгой байдал, хүний буруутай үйлдлээс үүдсэн болон байгалийн гамшгийн нөхцөл байдал болон тэдгээрийн хор уршгийг бууруулах чиглэлийн хамтын ажиллагааг хөгжүүлнэ.

#### **11 дүгээр зүйл**

Хэлэлцэн тохиролцогч Талууд зохион байгуулалттай болон эдийн засгийн гэмт хэрэг, терроризм, иргэний агаарын тээврийн аюулгүй байдлын эсрэг чиглэсэн хууль бус үйлдэл, мансууруулах эм, сэтгэцэд нөлөөлөх бодис, прекурсор болон зэвсгийн хууль бус эргэлт, соёлын болон түүхийн үнэт зүйл бүхий урлагийн бүтээл болон бусад зүйлийг хууль бусаар хил давуулахтай тэмцэхэд хамтран ажиллах, мөн иргэн, гэр бүл, эрүүгийн хэргийн талаар эрх зүйн туслалцаа харилцан үзүүлэхэд шаардагдах нөхцөлийг бүрдүүлнэ.

#### **12 дугаар зүйл**

Энэхүү гэрээнд дурдсан болон харилцан сонирхсон бусад асуудлаар Хэлэлцэн тохиролцогч Талууд болон тэдгээрийн эрх бүхий байгууллага хооронд холбогдох хэлэлцээр байгуулж болно.

#### **13 дугаар зүйл**

Энэхүү гэрээ нь Хэлэлцэн тохиролцогч Талуудын нэгдэн орсон олон улсын гэрээгээр хүлээсэн эрх, үүргийг хөндөхгүй.

#### **14 дүгээр зүйл**

Энэхүү гэрээг тайлбарлах болон хэрэглэхээс үүдэн гарах аливаа маргааныг Хэлэлцэн тохиролцогч Талууд хэлэлцэх болон зөвлөлдөх замаар шийдвэрлэнэ.

#### **15 дугаар зүйл**

Хэлэлцэн тохиролцогч Талууд харилцан тохиролцсоны үндсэн дээр энэхүү гэрээнд тусад нь протокол байгуулах замаар нэмэлт, өөрчлөлт оруулж болох бөгөөд тэр нь энэхүү гэрээний салшгүй хэсэг болно.

#### **16 дугаар зүйл**

Энэхүү гэрээг соёрхон батлах бөгөөд соёрхон баталсан тухай Батламж жуух бичгийг солилцсон өдрөөс хүчин төгөлдөр болно.

## 17 дугаар зүйл

Энэхүү гэрээг арван жилийн хугацаатай байгуулна. Хэрэв аль нэг Хэлэлцэн тохиролцогч Тал түүнийг цуцлах тухайгаа гэрээний хүчин төгөлдөр байх хугацаа дуусахаас зургаан сарын өмнө бичгээр нөгөө Талдаа мэдэгдээгүй тохиолдолд тав таван жилээр аяндаа сунгагдана.

Энэхүү гэрээг Нэгдсэн Үндэстний Байгууллагын Дүрмийн 102 дугаар зүйлд заасны дагуу НҮБ-ын Нарийн бичгийн дарга нарын газарт бүртгүүлнэ.

Энэхүү гэрээг ..... хотноо \_\_\_\_ оны \_\_\_\_ дугаар сарын .....-ны өдөр монгол, беларусь, орос хэлээр тус бүр хоёр эх хувь үйлдсэн бөгөөд эх бичвэр тус бүр адил хүчинтэй. Энэхүү гэрээг тайлбарлахад зөрүү гарвал орос хэлээрх эх бичвэрийг баримтална.

МОНГОЛ УЛСЫГ ТӨЛӨӨЛЖ

БҮГД НАЙРАМДАХ БЕЛАРУСЬ УЛСЫГ  
ТӨЛӨӨЛЖ

.....

.....